

Հայք վերստին կախեցին զլապտերն և ցրուեցան գիւղականք որք պատրաստեալ էին 'ի կռիւ . ընդ այս զայրացեալ Յունաց՝ արգելին զՀայս ելանել և մտանել յերկուց դրանց Այրին , բայց նոքա կատարեալ զպաշտօնն դարձան յերուսաղէմ : Յոյնք առ նախանձու ատելութեամբ վարէին ընդ Հայս՝ և խնդրէին գտանել զառիթս խռովութեան և պատրաստ մինչեւ ցհեղուլ զարիւնս , զի բացցի դուռն դնել բարուրանս 'ի վերայ Հայոց . սակայն նոյն իսկ գիւղական Ֆէլլաճք այգանէին զնոսա , չյուսալ Դատաւորին և յայլազգիս երուսաղէմի . զի ոչ կարեն կալ նոքա ընդգէմ հրամանի մեծի Արքային : Իսկ Թէոդորոս Պատրիարք գտեալ զմիջոց հաշուութեան գիւղականաց ընդ Քաղաքապետին , գնաց բազմութեամբ ուխտաւորաց և միաբանաց 'ի Ս . Ծնունդ յաւուր տօնի Անուանակոչութեան Տեառն ('ի 12 Յունվարի) , որոյ ուղեկից եղև Քաղաքապետն բազմութեամբ զօրաց . գլխաւորք և Շէյխք գիւղին ընդ առաջ ելին նմա ամբոխիւ զինուք և երկվարօք , եւ ուրախութեամբ մուծին զնա 'ի Բեթղէհէմ , յերեկոյ եւ յառաւօտ փառօք կատարեցին զհանգէս Տօնին : Թէոդորոս ինքն մատոյց զՍ . Պատարագն 'ի վերայ Ծննդեան տեղոյն Չերմեռանդ փառաքանօք 'ի փրկութիւն հոգւոց կենդանեաց և ննջեցելոց ազգին : Եւ 'ի գիշերին յայնմիկ Յոյնք փակեալ էին զհարաւային դուռն Այրին ըստ հրամանի Փոխանորդին իւրեանց , բայց Թարգման նոցին եկեալ յերուսաղէմէ ետ բանալ զնա , և ստիպէր բառնալ զզարդս խորանին որ յԱյրին , այլ ոչ անսացին նմա Հայք , և մնաց յերեկոյէ մինչեւ ցժամ պատարագի նոցին , թէպէտեւ եղև զժտութիւն և բանք 'ի մէջ երկուց ազգաց եւ Հայք ըստ վաղէմի սովորութեան իւրեանց 'ի ժամ պատարագին ելեալ Թափօրիւ 'ի հիւսիսային դրանէ Այրին , և անցեալ 'ի միջոյ մեծի եկեղեցւոյն դարձեալ իջին յԱյրն 'ի հարաւային դրանէ , նոյնպէս և 'ի վերաբերման և յայլ ժամանակս . և այսպէս փառաւորութեամբ կատարեալ զհանգէս տօնին , դարձան ուրախութեամբ յերուսաղէմ : Իսկ բազումք 'ի գիւղականաց Բեթղէհէմի Յոյնք և Լատինք յայտնապէս խնդրէին լինել Հայ և յաւելուլ 'ի ժողովորդ նոցա , որոյ վասն նախանձեալ Յունաց ասէին . թէ Թագա-